

求恕齋
叢書

渤海國志

渤海國志序

昔邵陽魏源著開國龍興記謂遼東青海外爲營州有古孤竹之墟肅慎氏之國孤竹在今遼西肅慎則今遼東吉林寧古塔其地自唐爲渤海而鄂多里城去寧古塔三百餘里 聖清發祥之地也渤海建國垂三百年雖迭有廢興而苗裔弗絕終以寢盛流澤滋長也亦神皋靈秀所鍾與涉江先生抗行而希古博辯以披文自丁世迪孤窮介潔常恍惕於世變之日紛危亂之日亟以爲人禽慘贖網維潰崩有不勝其深悲隱痛者其所述作皆有關世運之盛衰非苟爲闕麗恢張者比也今

年成渤海國志四卷曰原始曰紀年曰後紀年凡爲志者八表二列傳三上溯肅慎之始下迄金源滿洲莫不詳載自有此作而渤海一國之史乘乃備焉已國家不幸使邪說橫流凶豎搖毒倡爲離析滿漢之風遂覆宗社使知肅慎肇封遠隆三后以至興京毓聖天遂方昌或者猖狂之說悖逆之行不至是極乎抑余尤有感者數年以來人嗟蕩析愁憂感舊計且無聊回溯盛時若嬰兒之慕慈母游子之悲故鄉有莫知其所以然者先生以是編付余梓諸叢刻中蓋虞其散佚也莊生曰舊國舊都望之愴然雖使邱林草木之縉入之者十九猶

之暢然況見見聞聞者邪吾知先生不能無感也歲在
己未閏七夕吳興劉承幹序於嘉業堂

序

光緒壬午京兆試得人稱盛陶齋結纓於資州素菴采
薇於膠島其屈抑副車崎嶇薄宦而能以文章忠義相
與頡頏者則瓜爾佳元素司馬其人也司馬少時隨侍
式梁先生於揚郡及見何子貞太史長返都門從濮青
士太守講詞章張叔憲駕部談書畫嗣復出吳縣潘文
勤之門遂深於金石考據之學水曹事暇有書人輯略
之編京輦舊聞有天咫偶聞之刻論詩則有香奩集發
微攷史則有洛陽伽藍記鉤沈授讀龍溪鄭氏爲刻叢
書其兩漢三國學案成於斯時鄭氏爲之付梓著作等

身卓然爲滿洲文學之後勁位雖不達名則遠聞近復
出渤海國志見眎不以鍾義爲不學謬使校訂竊謂吾
鄉先正輿地之學不乏專書如圖瑤圃七椿園和簡勤
松文清類皆使車所至裒輯見聞其成書爲較易元素
儉德辟難家鮮藏籍滬俗吝嗇一瓿鮮借渤海故實荒
遐以之問人多瞠目撝舌而不知所對期月之閒遽能
巨帙裒然斯爲神勇陶齋已矣素菴憂傷憔悴神明未
衰他日海天清晏兩君儻單車襍被作健東游過畢郢
之舊京訪漢唐之遺跡耳目所及當有補原著所不及
者鍾義未老尙能操不律而從其後也已未秋九月尼

堪楊鍾羲序

渤海國志序

一 求恕齋


江龍黑

部水黑

海

渤海國地圖

凡加圍者皆今地名其古地名亦大
致如是未敢云悉
合惟蓋州存疑故
未列入圖內



海

渤海國志卷一

求恕齋叢書

李寶唐 晏纂

吳興劉承幹校

原始

渤海古肅慎也虞舜紹堯首服德化大戴禮記孔子之對謂之四海成王嗣世來賀卽位尙書存賄肅慎之命列於諸侯故周襄王之告諸侯肅慎與燕亳竝稱其爲封建之國等於箕子之封朝鮮太伯之封句吳焉暨乎漢武滅朝鮮以其地爲眞番臨屯樂浪元菟四郡而肅慎之地遂在封域之中東漢以後一隔於公孫淵再淪

於慕容皝於是夫餘句驪濊貊沃沮爭起而據之昔之
形勢始變厥後有挹婁勿吉靺鞨之異稱實則不過一
部之名而肅慎之爲肅慎初未嘗變及夫唐初舍利氏
自立爲震國王唐中宗因封爲渤海郡王而渤海之名
肇矣建國將三百年初滅於契丹再阨於金源重興於
滿洲雖遷變不恆而爲肅慎之苗胄則終古未變也考
渤海出於勿吉勿吉之在南北朝共分七部一曰粟末
部與高麗接二曰伯咄部在粟末北三曰安車骨部在
伯咄東四曰拂涅部在伯咄東五曰室韋部在拂涅東
六曰黑水部在安車骨部西北七曰白山部在粟末東

南渤海之先出於粟末部姓舍利氏及封渤海改姓大氏降及遼金大氏猶有子遺其入高麗者易姓王氏昔唐張建章有渤海國記三卷見於唐志久已不傳爾後諸書略及一二獨唐書及策府元龜所載渤海遺聞尙夥 國朝本之以成滿州源流考下及契丹國志大金國志松漠記聞通志五代會要東國通鑿諸書各有傳述然卒無臚陳渤海一國之事以爲成書者余不自揆竊援昔人契丹國志大金國志之例網羅放失整比舊聞俾後之人得以上考肅慎下接金源滿洲竟委窮原了如指掌足知一代之興其聲名文物蓋有有開必先

者而紬繹其廢興存亡亦足以資鑒於後世矣

紀年

高王祚榮姓大氏舍利乞乞仲象之子也

一統志作齊齊克仲象

其先爲女真粟末部人粟末因粟末水以爲號卽今松

花江也初埶於高麗唐高宗時李世勣滅高麗仲象率

眾保挹婁之東牟山

讀史方輿紀要山在瀋州衛東二十里按瀋州今奉天世勣滅高麗

直抵王都仲象若保瀋州山則應在其北何以云東保

按挹婁故地爲渤海之定理府在今鐵嶺以南則東牟

者卽盛京之東山今天柱山也以泥河爲境東窮海西鄰契丹築城郭

以居高麗遺殘稍歸之萬歲通天中契丹李盡忠殺營

州都督趙鹵反仲象與乙四比羽及高麗餘眾東走度

遼水保大白山

卽長白山

之東北依粵婁河

一統志作鄂羅河一源出吉林安

班和托峰一流入哈達河一流至開原人清河

樹壁自固武后封比羽爲許國

公仲象爲震國公赦其罪比羽不受命后詔玉鈐衛大

將軍李楷固中郎將索仇擊斬之時仲象已死祚榮引

殘夷逝去楷固窮躡度天門嶺

此嶺當在長白山以東或卽錫赫特山北大嶺

祚榮因高麗靺鞨兵拒楷固楷固敗還時契丹坳突厥

唐師道梗祚榮卽并比羽之眾恃荒遠乃自號震國王

遣使交突厥地方五千里戶十餘萬勝兵數萬盡得扶

餘沃沮并韓朝鮮海北諸國地唐武后聖歷中稱臣朝

貢中宗時唐遣張行岌來遂遣子門藝入侍睿宗遣使

拜王爲左驍衛員外大將軍渤海郡王領忽汗州都督
國稱渤海元宗開元中薨諡曰高王唐遣使來弔祭

王武藝初封桂婁郡王旣立斥大土宇東北諸夷畏之
唐賜典冊襲封王爵并所領始改元曰仁安未幾北方

黑水靺鞨

卽金之先世
今黑龍江地

朝唐唐以其地建黑水州以其

首領爲黑水都督諸部刺史屬焉唐置長史就其部落

監領之王乃遣其弟門藝及舅任雅相擊黑水門藝固

諫乃遣從兄壹夏代之門藝殺之而奔唐王乃上書於

唐請殺門藝唐不從後十年王遣大將張文休攻登州

萊州殺刺史韋俊唐命新羅王金興光來攻南境不能

克按韓昌黎集烏石廟碑渤海上至馬松山吏民逃役
失業尙書領所部兵塞其道漸原累石離四百里高
深皆三丈寇不得進民選其居黑水室韋以騎五千來
屬邊威益張正與此合又按全唐文新羅金忠信請充
寧海軍副使從討靺鞨表有云陛下新有制加本國厥
王興光寧海軍大使錫之旌節以討兇殘亦指此舉厥
後王亦悔過上表歸伏令大成慶等入朝且表突厥遣
使求合擬會攻奚及契丹王欲執送其使唐不許王薨

謚武王

王欽茂開元二十六年立改元大興遣使如唐寫唐禮
及三國志及三十六國春秋赦境內徙都上京直舊都

三百里忽汗河之東事在天寶末年按光緒中有人於

渤海王大武藝墓磚余曾得其拓本係陽文隸書有渤
海大興某年字以此考之則文王未遷以前渤海實都

西京故武王亦葬西京
至此年始遷上京也 先是天寶中加王特進太子詹

事肅宗大曆中又進檢校司空寶應元年晉太尉王以

日本舞女十二人獻於唐貞元中徙都東京
即龍原府在南海濱

王薨諡文王

王華璵文王之孫先是文王世子宏臨蚤卒族弟元義
立一年猜虐國人弑之而立成王改元中興還都上京

薨諡成王

王嵩璘成王子
唐會要作文王子此從唐書 初冊爲郡王改元正歷

唐授右驍衛大將軍忽汗州都督貞元十四年加銀青

光祿大夫校司空貞元間薨諡康王

王元瑜康王子改元永德唐冊爲銀青光祿大夫檢校
秘書監忽汗州都督諡定王

王言義定王之弟初爲權知國事卽位改元朱雀薨諡
僖王

王明忠僖王之弟改元太始薨諡簡王

王仁秀簡王之從父也其四世祖野勃高王之弟也改
元建興南定新羅討伐海北諸部開大境宇唐詔進金
紫光祿大夫司空元和四年薨諡宣王

王彝震宣王之孫也宣王子德新蚤卒初爲權知國事
旣乃立之改元咸和唐太和七年遣學生赴唐上都學

問先所遣學生三人事業稍成請歸本國會昌中薨諡
缺

王虔晃彝震之弟薨年及諡缺

王元錫缺

王諲譔開平元年遣使至梁時東北諸夷皆役屬契丹
惟渤海不服契丹主謀寇燕恐渤海倚其後乃先舉兵
擊渤海後唐同光元年冬十月遼舉兵來伐不克而退
天成元年冬十月遼又來伐二年正月攻破夫餘城守
將死之王命老相將兵迎敵大敗丙寅遼兵圍忽汗城
辛未王素服繫索牽羊率臣三百餘人出降丙子遼人

入城接軍器者爲邏卒所殺遼主怒攻城城破遂俘王
以歸於上京西築城以居之賜名烏魯古妃曰阿里只
世子光顯與將軍申德禮部卿大和鈞司政大元鈞工
部卿大福謨左右衛將軍大審理工部卿吳興檢校開
國男朴漁小校冒豆干率其餘眾前後奔高麗共數萬
戶高麗王錫光顯姓名曰王繼附之宗籍使奉其祀僚
屬皆賜爵渤海遂亡

以上皆本之兩唐書及冊府元龜
通鑑唐會要五代會要東國通鑑

等書

論曰乞乞仲象以敗亡之餘走險自保同太王之去邠
高王祚榮以席業之資翦棘開基類句踐之興越及幅

幘旣建乃以文德修之改制度建官號列郡縣又克盡
事大之禮遣寫書之官遂得比跡中原抗手上國方域
至五千里祚國至三百年當時四方殆無逾之者亦云
盛矣厥後移刺氏暴興遂其蠶食臥榻之旁遂不能不
醒長宵之夢矣此事雖代代不免然殷墟麥秀周室黍
離溯其遺聞固有千秋同慨者昔屈靈均云孰兩東門
之可蕪劉更生曰人君莫不欲安然而常危莫不欲存
然而常亡夫二子之言誠沈痛矣而亦卒無救於國者
豈非以存亡之故起於人事成於天命而竟非區區口
舌所能措置於其閒耶嗚呼然而金輪初封仲象爲震

國公帝出乎震遂以肇完顏愛新之基天命所歸於茲兆矣

後紀年

契丹天顯元年三月安邊定理鄭頡三府不肯臣遼而復爲渤海契丹遣安端攻下之誅其帥二人五月辛酉南海定理二府復舉兵契丹遣堯骨即太宗舊名攻之六月

破之七月鐵州刺史衛鈞舉兵堯骨攻拔之遼史唐天成

元年即遼天顯元年四月遣使大陳琳等百六十人進兒女口

三及人參昆布白附子虎皮等於唐七月使人大昭佐

等六人朝唐十一月渤海王弟部領兵士攻圍夫餘府

城不能克遼遷夫餘府民以實東平其民或亡入新羅

女真

遼史

四年遣使臣高正詞貢方物於唐長興元年正

月遣平憲等朝貢於唐歸被黑水剽劫二年使文成角

朝貢於唐三年正月遣使朝貢於唐清是六年遣列周

義朝貢於唐

冊府元龜

宋太平興國四年大鸞河率小校李

助等十六人奔宋

宋史

六年宋賜烏舍城浮渝府瑋府王

按以上諸名非渤海本有疑後有更改

詔曰聞爾國爰從前代本是大藩

近年以來頗爲契丹所制宜率部族來應王師朔漠之

外悉以相與以將發師大舉故先告諭俾爲應也

宋會要

冬遣使上表曰安定國王烏元明言臣本高麗舊壤渤

海遼黎保據方隅涉歷星紀頃歲契丹入侵境土攻破
城寨俘掠人民臣祖考守節不降與眾避地僅存生聚
以訖於今而又夫餘府昨背契丹竝歸本國災禍將至
無大於斯所宜率兵助討必欲報敵元興六年十月日

按據五代會要云契丹所克僅扶餘一城亦不言俘王
事且此後連書遣使人貢至清泰三年似此十年中渤
海初未亡者豈謬誤既虜而烏氏遂繼起如大
石林牙之西遼者耶蓋不可考僅此一表存耳宋復荅

詔端拱二年遣使獻馬及雕羽鳴鏑澤化元年王子大

元上表文獻通考遼統和十四年渤海燕頗等侵鐵驪道遼

遣奚王和碩奴等討之不克二十一年四月遣使貢於

遼太平九年八月東京舍利軍詳穩大延琳東國通鑑
曰大祥榮

七世 孫 囚留守駙馬蕭孝克及南陽公主殺戶部使韓紹

勳等卽位曰興遼改元天慶延琳先與副留守王道平
謀道平夜踰城與延琳所遣召黃龍府黃翩者俱往告
於遼時蕭匹敵先率兵據要害絕其西渡之計渤海太
保夏行美先戍保州延琳密馳書使圖其統率耶律蒲
古行美反以實告蒲古遂殺渤海兵八百人而斷其東
路延琳知黃龍保州皆不附遂分兵西取瀋州節度副
使張節聲言欲降故不急攻及知其詐而已有備不克
而還時南北女真皆從延琳及諸道兵皆至

東國通鑑
曰興遼國

太師大延定引東北
女真與契丹相攻

延琳嬰城固守遼燕王蕭孝穆攻

之十年八月延琳將楊祥世夜開南門納遼軍延琳遂

敗遼人遂遷渤海分居來隰遷閏等州遼史秋九月興國

鄧州刺史李匡祿赴高麗告急尋聞國亡遂留不歸東國

通鑑時去渤海之亡一百三年矣閱八十年遼天慶五六

年又有古欲及高永昌事古欲爲饒州渤海人時天祚

帝敗於女眞五年二月古欲遂自稱大王遼人討之爲

古欲所敗五月又戰古欲敗績丙辰獲古欲契丹國志遼東

留守蕭保先爲政酷虐六年正月朔東京裨將渤海高

永昌與數十人乘酒恃勇持刀踰垣入府衙登廳問留

守所在給云外兵變請爲備保先出眾殺之有戶部使

大公鼎亦渤海之裔登進士第聞亂作遂權留守事與副留守高清臣集諸奚漢兵千餘人揆索渤海數十人殺之初三日渤海軍馬抵首山門公鼎等登門諭之不退初五日夜城中舉火內應開門騎兵突入陣於通衢公鼎清臣戰不能勝奪西門出奔遼永昌自稱大渤海皇帝改元應順或作隆基據遼東五十餘州獨瀋州未下所在奚人挈家渡遼以避之契丹國志閏月貴德州守將耶律余睹以廣州附於永昌遼史遼命宰相張琳討之旬日間三十餘戰渤海稍卻退保東京張琳兵距城五里隔太子河紮寨留五日糧決策破城越二日安德州軍先渡

河大軍以次繼進忽上流有渤海鐵騎五百突出其旁
遼軍不支而退保舊寨三日不得渡糧盡乃退渤海騎
兵尾襲至瀋州強壯者僅得入城老幼悉被掠遼人方
議再舉忽承女真檄文準渤海國王高永昌狀遼國張
宰相統領大軍前來討伐乞救援於義卽合應援已
約五月二十五日進兵遼人以爲渤海詐作此檄不爲
備是日東北有軍擁至將士呼曰女真至矣遂潰女真
徑入瀋州遼師旣敗女真卽攻東京永昌大敗遁入海
女真以騎三千追及於長松島按此疑卽今盛京以南各島金人旣
破城慮渤海人難制遷徙之富室安居踰二百年往往

爲園池植牡丹多至二三百本有數十榦叢生者皆燕地所無纔以十數千或五千賤貨而去其居故地者仍

歸契丹

契丹國志

論曰自古國亡而人心不死未有如渤海者也始而渤海王弟率兵攻夫餘繼而有烏元明之自王三而有大延琳之興遼至高永昌而四矣而遼亦與之共盡是其亡而不亡敗而不安於敗古云渤海三人敵一虎誠虎若也哉不意完顏不仁用刈其燼亦云酷矣吾聞明萬曆時建州左衛有王兀堂者與右衛婁啟兵爭而卒折而入於右衛其人卽完顏氏苗裔也古云天網恢恢疏

而不失其信然乎

渤海國志卷一

渤海國志卷二

率賓唐 晏纂

吳興劉承幹校

地理志

上京龍泉府即忽汗城領龍湖渤三州

按忽汗城在今寧古塔以呼爾罕河得名一統志云
寧古塔西南六十里瑚爾哈河之南有古城周三
十里東西南七門內城周五里東南各一門內有
宮殿舊基此即渤海上京舊城顯明可考而一統志
以為金之會寧府考金上京會寧府在阿勒楚克河
拉林河之間去寧古塔三百九十里矣絕域紀略云
土人名賀龍城
柳邊紀略云沙闌城在寧古塔西八十里內存石塔
一石觀音一紫石碑一書類率更城北十餘里有石
橋二九洞今石雖圯而柱尙存將軍使人浚井得朱

漆井亭木方尺顏色甚鮮
賈耽道里記云渤海王城臨忽汗海北有德理鎮

龍州領縣四

富利 長平 佐慕 肅慎

接遼史地理志大祖伐大譚漢遷長平民於臨潢西
北是遼伐渤海實至上京矣而五代史宋史通鑑通
考皆以爲但拔夫餘府一城而遼史以忽汗城爲即
平壤又以爲卽中京顯德府均誤又以龍州卽黃龍
府尤誤遼志於地理最疏所考漢縣尤誤今不從之
賈耽道里記云忽汗城南三十里有古肅慎城

湖州興利軍有刺史

按湖州之名當卽在今阿卜湖左右阿卜湖又名畢
爾騰湖又名鏡泊

湖州清化軍有刺史領縣一

貢珍

按唐會要渤海又有德理府不見遼史而賈耽道里
記則作德理鎮此或當時有所改易不可知德理之
名則至今猶在但訛爲德林又名德林石在鏡泊之
北滿洲源流考德林石在寧古塔西九十里大石廣
二十餘里孔洞大小不可數計或圓或方或六隅八
隅如井如盆如池深丈餘或數尺中有泉澄然凝碧
或潛鱗游泳或中生樺榆等樹夏無蚊蚋麋鹿羣聚
於中

中京顯德府領盧顯榮鐵湯興六州

按遼史高永昌據東京遼遣張琳討之距城五里隔
太子河割寨遼東京卽渤海之中京今遼陽城北有
古東京則中京顯州卽今遼陽
一統志釣魚臺在遼陽州南三十里相傳爲渤海游
觀之所

盧州

亦曰杉盧郡
有熊岳山

領縣五

山陽 杉盧 漢陽 白巖 霜巖

按盛京通志蓋平縣南六十里有熊岳城卽金熊岳縣盧州所併也

顯州領縣五

金德 常樂 永豐 雞山 長寧

按柳邊記略遼河套在開原北舊顯州城下則顯州城至今尚在而在開原以北
滿洲源流考云常樂故縣在遼陽城內長寧縣在遼陽西南蓋平之東永豐縣在海城縣西六十里遼水東岸明時有永豐堡

鐵州領縣四

位城 河端 蒼山 龍山

按五代史自錦州西行五六日過海北州又行十餘日渡遼水至渤海鐵州又按西當作東
按盛京通志今蓋平縣東九十里有鐵場堡

湯州領縣五

靈峰 常豐 白石 均谷 嘉利

按明一統志湯州故城在遼東都司城北今廣寧境內

興州領縣三

盛吉 蒜山 鐵山

按松漠紀開銀州南鋪五十里至興州四十里至蒲河銀州今鐵嶺縣蒲河源出承德西北

東京龍原府亦曰柵城府南瀕海日本領慶鹽穆賀四道也有宮殿疊石為城

州

按鳳城雜記曰朝鮮安市城在鳳皇山麓以石為城周十餘里設二門石堞俱存

按遼史開州本濊貊故城渤海為東京龍原府開州今在朝鮮蓋自鳳皇城邊外東南至朝鮮之江原道

皆滅地則鳳城雜記所云安市石城者或卽渤海之

東京也
唐書薛仁貴征高麗與其大將溫沙門戰熊山擒射者於石城卽此

慶州

亦曰龍河郡

領縣六

永安 龍原 烏山 辟谷 熊山 白楊

按朝鮮開州西有熊山城又慶源邑在混同江南白岳山下地近古慶州

鹽州

亦曰龍河郡

領縣四

海陽 接海 格川 龍和

穆州

亦曰會農郡

領縣四

會農 水歧 順化 美

按今開州南有穆州城

賀州

亦作吉理

領縣四

洪賀 送誠 吉理 石山

按今朝鮮咸鏡道吉州別名吉城當是賀州

南京南海府

爲沃沮故地疊石爲城幅頓九里新羅道也

領沃暗椒三州

按遼史大延琳叛南海城堅守不下別部皆被擒乃降盡徙其民於上京置遼縣

五代史自鐵州行七八日至南海府鐵州今錦州則南海府大略可知

遼史海州本沃沮國地高麗爲卑沙城盛京通志渤海南京城在海城境內

沃州領縣六

沃沮 鷲岩 龍山 濱海 昇平 靈泉

按滿洲源流考沃州爲南海附郭則沃沮亦附郭邑也又云卑沙城卽今海城

晴川領縣五

天晴 神陽 蓮池 狼山 仙巖

按滿洲源流考云海城西南有蓮花泊或卽蓮池故縣地

椒州領縣五

椒山 貂嶺 漸泉 尖山 巖淵

按滿洲源流考云遼之耀州卽渤海椒州今有耀州故城在海城縣西南六十里巖淵在海城西南一百二十里

西京鳴淥府

城高三丈廣輪二十里朝鮮道也

領神桓豐正四州

按滿洲源流考曰淥州在平壤西境因鳴淥爲名也

神州領縣三

神鹿 神化 劍門

桓州領縣三

按桓州卽高麗之丸都見三國志高麗人名爲卒本夫餘卽今高麗成川府在平壤之東晉康帝建元初高麗爲慕容皝所敗宮殿焚蕩乃棄丸都遷都平壤丸都本高麗之中都也

桓都 神鄉 湏水 卽今高麗大同江發源於寧遠東北歷平壤南入海

豐州 亦作盤安郡 領縣四

安豐 渤恪 卽泊 隔壤 硤石

按唐賈耽道里記自鴨渌江口舟行百餘里又小舫溯流東北三十里至泊口得渤海之境又溯流五百里至丸都縣城故高麗王都又東北溯流二百里至神州

按賈耽所記由鴨渌江口舟行至泊口卽豐州之渤恪縣又五百里至丸都卽桓州又二百里至神州

考丸都卽高麗之成川府地在大同江之上流若鴨
涿江則與成川風馬牛何由得至或者耽所溯者高
麗之大同江也渤海之西京地今高麗之平安道其
南京地今高麗之咸鏡道也耽彼時由大同江入口
溯流而上歷成川德川之境越咸鏡道以至寧古塔
不然則以地理求之無一合者考寧古塔紀寧古塔
西南有地名紅旗街可通高麗此耽所由之路若云
鴨涿江則卽耽所云泊泊口丸都縣神州者均應在
鴨涿江以北長白山麓佟家江左右之地而與所云
丸都爲高麗王都者大不合矣又滿洲源流考云今
考丸都在高麗王京東北賈耽記云在神州西南一
百里鴨涿江口東北六百里與此正合信如其言鴨
涿江口東北六百餘里則已入吉林界矣此處烏容
有高麗王都乎又烏容有沮水乎存疑可也

正州亦作沸
流郡 領縣一

東那

接高麗成川有沸流水則正州去成川當不遠成川
在平壤之東南可知高麗平安道之屬渤海矣按

洲源流考云大概上京在寧古塔中京在遼陽東京在朝鮮開州南京在海城縣西京濱鴨綠江此言也大致得之而不悟彼時高麗久亡其北境全入渤海南境則歸新羅新羅都城在慶州極南界也則高麗北境如平安咸鏡二道渤海烏容無郡縣則所謂西京者固不止於濱鴨綠矣

長嶺府

營州領葭河二州

按賈耽記云長嶺府千五百里至王都則耽當日至渤海路固由吉林之西南矣

按滿洲源流考吉林西南有長嶺子自長白山南一嶺環繞至此眾水分流東北爲遼吉善輝發等河西北爲哈達葉赫爾蘇等河長嶺之名當取諸此按高麗咸鏡道永興縣別名長嶺亦名和州其地西去卽成川東北卽吉州皆渤海舊壤存之俟考

葭州

河州

有軍器坊

高麗咸鏡道有和州疑卽河州之訛亦如益州之訛

夫餘府

爲扶餘故地契丹道也常屯勁兵以捍契丹

領扶仙二州

按遼史黃龍府本渤海夫餘府

柳邊記略以黃龍府在今石頭河雙陽河間爲吉林

之西混同江之南滿洲源流考以爲在今開原及開

原邊外之境吉林志以夫餘府爲今長春農安二縣

境諸說存參

按宋太宗賜浮渝府瑗舍王詔卽夫餘府

扶州

仙州領縣八

永平 夫餘 布多 顯義 鴿川 強師 新安

漁谷

按遼史夫餘府遼改黃龍府太祖名龍州聖宗改名保寧七年以叛人餘黨置通州其屬縣皆兼併渤海

舊名故遼史雖有渤海縣名而再經改易不能知某縣隸扶州某縣隸仙州矣

鄭頡府

本藁離國地

領鄭高二州

按在今昌圖以北以西盛京通志以爲在開原縣境內失之

鄭州領縣二

越喜 萬安

高州

遼史作頡州

按昌圖北有八面城去昌圖百一十里又有四面城去昌圖四十里或者爲鄭高二州遺墟

安寧郡

藁離國故地

按滿洲源流考此安寧郡當爲鄭頡府之支部按藁離國今昌圖城北三十里有藁離城

定理府

又作安定郡有刺史挾婁故地

領定濬二州

有范河清河

按今奉天北有懿路河卽揭婁也則定理府在奉天東北與京左近

定州領縣一

安夷

瀋州領縣九

定理 平江 巖城 慕美 安夷 瀋水 安定

保山 能利

按瀋州卽今奉天至所領九縣亦當分屬二州今不可考且安夷兩見亦誤
盛京通志瀋水在承德城南四里古瀋州應在今承德縣城內

安邊府領安瓊二州

安州領縣一

新安

按張棟金圖經銀州南鋪至銅州南鋪四十里至咸州南鋪四十里至信州北鋪四十里至安州南鋪四十里銀州即今鐵嶺安州去之百六十里則在今葉赫矣

瓊州

按瓊州關當亦去安州不遠

率賓府

率賓國故地

領華益建三州

按率賓府金代為恤品路或云今綏芬也明志稱在建州東南即建州衛之地然未能實指其地所在若以為渤海之建州則去綏芬亦不遠矣
盛京通志恤品路在興京東南邊外西北至金上京一千五百七十里東北至胡里改路一千一百里

華州

無攷

益州

按鴨深江一名益州江則益州自在鴨深上源盛京通志鳳皇城東一百二十里朝鮮有義州士人呼愛州或者以音近傳訛未可知也

建州

按元代一統志混同江俗呼松阿里江源出長白北流經舊建州西五十里以此考之則建州之地應在吉林東南額多力城之西本國朝發祥之地考寧古塔紀略云寧古塔城東有覺羅村傳為我朝發祥之地而柳邊紀略則作覺羅城大清一統志云鄂多理城在興京東一千五百里本朝最初建都於此盛京通志引元史塔出傳乃顏叛塔出棄妻子與麾下十二騎直抵建州距咸平千五百里咸平今開原縣境以地考之則額多力城去開原固千里餘正可與元一統志互證建州所在則前人謂明建州衛

卽渤海建州信矣

東平府

本拂涅故地

領伊蒙沓黑比五州

按遼史拂涅國城渤海爲東平府唐太宗親征高麗李世勣拔遼城卽此志又云遼州有遼河羊腸河錐子河蛇山狼山黑山中子山今考羊腸河在廣寧城東四十五里錐子河在廣寧東北四十里卽珠子河也遼河亦經廣寧東北二百四十里蛇山一在城東三十里一在東北九十里狼山今名狼虎山在東北二十里黑山有四皆在城東及東北

伊州

蒙州領縣一

紫蒙

按遼金有紫蒙館宋人多著於行記今新民府界遼志以紫蒙爲漢饒方縣地考饒方在今高麗平壤

相距太遠遼志所考漢縣全不可信

沱州

按遼志貴德州有沱河或卽沱州地貴德州卽漢襄平縣在今遼陽州北七十里卽渤海之崇州

黑州

比州 以上五州共領縣十八名闕

按比州或云作北州按東平府地居今錦州廣寧之閒所云五州亦不出此地左右比州之作北州或因北鎮而名黑州之名或因唐代黑水府而名

東平寨

產鐵

按一統志錦州西五十里有古紅螺山寨土人相傳云渤海建此當卽東平寨之故址

按明史廣寧中屯皆有鐵廠

懷遠府

本越喜故城

領達越懷紀富美福邪芝九州

按越喜部在黑水東南今三姓以東至海地此懷遠之越喜城則唐代之越喜州也

達州

越州

有柁河柳河

領縣四

粵喜 豹山 乳水 萬安

按遼東行部志柳河縣舊韓州也以城近柳河故名又元一統志柳河縣本越喜縣契丹併入安方縣安方卽萬安也

按嘉慶中將軍富俊於八面城土中得銅鏡背鑄韓州刺史字考遼韓州卽渤海之越州也以此知八面城卽越州故城而懷遠府應在昌圖左近矣又按滿洲源流考遼河與潢河會自闕原入邊經鐵嶺縣繞城而西南至開城爲巨流河又名柁柳河

懷州

懷遠軍，領縣一

懷福

按懷州當爲懷遠附郭故有懷遠軍號

紀州

富州

置銀冶嘗改銀州領縣二
有范河柳河柴河

富壽 優富

按富州今鐵嶺縣地明洪武中遷鐵嶺於古歸州卽
銀州范河在鐵嶺南三十里柴河在北二里遠河卽
柳河

美州 領縣三

山河 黑川 麓川

福州

按胡嶠北行記東行過一山名十三山云此西南去
幽州二千里又東行數日過衛州至福州十三山今
屬錦縣則福州約略可會衛州當作韓州卽越州也

邪州

芝州

鐵利府

鐵利國故地

領廣汾蒲海義歸六州

按鐵利亦作鐵驥遼史渤海鐵利府地多鐵

廣州

有遼河東梁河遼河大口

按廣州至金代併入章義縣今承德縣西有章義站
梁河卽太子河會遼河至牛莊入海當卽遼河大口

汾州

蒲州

有蒲河

按元一統志蒲河源出蒲谷流經蒲水田過松漠記
聞蒲河四十里至藩州今承德縣西北四十里香鑪
山蒲河源出焉

海州

按海州疑卽今海城或海城以北以西之地以近海
而名耳

義州領縣二

義豐 富義

按遼史宜州崇義軍東丹王每秋畋於此金爲義州
其地實渤海義州故處今義州西南有饒慶縣城滿
洲源流考以爲置自渤海而渤海無此縣或遼金所
名

歸州領縣一

歸勝

安遠府領寧鄯慕常四州

按高麗安州又名寧州而滿洲源流考以爲高麗定遠府

寧州 領縣一

新安

鄆州

慕州 領縣二

慕化 崇平

按遼志慕州久廢縣二隸涿州涿州近鴨綠江然則慕州地當去朝鮮義州不遠

常州

按滿洲源流考以常州地屬朝鮮定遠府

郢州 獨奏州有彰聖軍

按盛京通志云渤海郢州在今永吉縣境內又按東國通鑑載興遼國遣郢州刺史李匡祿來告急則郢州地近高麗矣

銅州 又名銅山郡 獨奏州有廣利軍領縣一

花山

按銅州地近岫巖在遼爲咸州花山縣遼改析木今海城縣東南四十里有土堡曰析木城當是花山故城

涑州 有刺史 獨奏州

按涑州以近涑末江而名則在今寧古塔左近

以上三州爲獨奏州

按滿洲源流考云獨奏之義當猶今直隸州不轄於府而事得專達也以此言之則後世直隸州之制實本之渤海也

蓋州

又改辰州以領縣一井邑駢列最爲衝會

建安

按盛京通志云蓋州本高麗蓋牟城唐太宗改爲蓋州渤海因之卽今蓋平縣

愚按通志之說蓋本之一統志而實未確夫蓋牟之名因蓋馬山而來考漢時元菟郡有西蓋馬邑馬訾水所出也西北入鹽難水馬訾水卽今鴨綠江鹽難卽今圖門江則蓋馬地在今長白山南去今蓋平卽太宗所改之蓋州且千里矣若辰韓本名秦韓秦末中國人逃入朝鮮朝鮮以海東地處之後爲新羅所都卽高麗之慶州去今蓋平不止千里矣然則渤海之蓋州固不能越境而居新羅又未必在今之蓋平至於遼史所載渤海州縣又遷徙不定更難作憑則此蓋州存疑可也不敢望文生義而信爲卽今蓋平

也

崇州領縣三

崇山 滄水 緣城

按遼史崇山緣城在貴德州下云本漢襄城縣公孫度所據遺址猶存則崇州蓋在襄平今遼陽州北七十里

又滿洲源流考以崇州卽中京之榮州

集州

古脾離郡地有渾河領縣一

奉集

按奉集廢縣在今撫順城南八十里渾河卽小瀋水承德縣東南四十五里有土城名奉集堡

麓州領縣二

麓波 雲川

按遼史乾州司農縣下云本渤海麓郡併麓波雲川
二縣入焉乾州本漢無慮縣因書巫閭得名則麓州
亦因北鎮之麓而名歟

賓州領縣四

永平 永寧 豐水 扶羅

按遼史賓州下云本渤海城四縣皆渤海置

以上五州皆不詳所隸唐書亦無之

按遼史太祖紀滅渤海歸丙午次慎州甲戌次扶餘
府不豫則慎州必在渤海境內遼史無之記此俟考

論曰渤海之境蓋據有今奉天吉林二省高麗咸鏡平
安二道黑龍江亦在鶴廢之中遂有五京十四府六十
六州一郡一寨百三十八縣幅圓五千餘里可云盛矣

自禹域之外古所未聞也然以遼金史考之則每縣蓋數百戶多者千戶而已則當日粉飾昇平以圖美觀或所不免然而以視周禮四井爲邑之制蓋遠過之古者治民之官多布政之官少故易以爲治後世地方百里而蒞以一官不知百里者古之大國也有君有卿大夫士蒞之者不啻百人故隱伏無不知也罪狀無不舉也人才無不出也若後世一縣之事名爲令治之實則吏胥治之耳此輩惟利是視豈顧民生令之視事不過歲月之間耳輒相代去而吏胥終古不易雖有善者亦無如之何正此之謂然則民何以安國何以治反不如渤

海之民稀事簡可以收鳴琴之效此老聃所以願小國寡民其言信可師也哉

職官志

宣詔省

左相 左平章事 侍中 左常侍 諫議

按此仿唐門下省制也唐書門下省有侍中後改左相又有左散騎常侍左諫議大夫掌出納帝命

中臺省

右相 右平章事 內史 詔誥舍人

按仿唐中書省制唐書中書省又曰中臺有中書令及右僕射又改爲內史龍朔元改曰右相光宅元年改內史又有侍郎及舍人

政堂省

大內相一人

比尙書令

左司政二人

右司政二人

比僕射左

允

右允

比丞

按此仿唐尙書省制唐尙書省尙書令一人左右僕射各一人左右丞各一人總六尙書事

左六司

忠部卿

仁部卿

義部卿

居司政下

按忠部以擬唐吏部仁部以擬戶部義部以擬禮部

支司三

爵部

有郎中員外郎

按爵部擬唐吏部而省其司封司勳考功三職

倉部 有郎中員外郎

按倉部以擬唐倉部而省其戶部度支金部三職

膳部 有郎中員外郎

按膳部以擬唐膳部而省其禮部祠部主客三職

右六司

智部卿 禮部卿 信部卿 同上

按智部以擬唐兵部禮部以擬刑部信部以擬工部

支司三

戎部 有郎中員外郎

按戎部以擬唐兵部而省其職方駕部庫部三職

計部 有郎中員外郎

按唐書龍朔二年改比部曰司計此擬之而省其刑部都官司門三職

水部 有郎中員外郎

按水部以擬唐水部而省其工部屯田虞部三職

中正臺

大中正 比御史大夫
居司政下

少正 比御史
中丞

按中正臺以擬唐御史臺而其下之侍御等蓋史略之必非無之也

殿中司

大令

少令

按殿中司以擬唐殿中省大令以擬監少令擬少監而唐制尚有六局此則不詳

宗屬司

大令

少令

按宗屬司以擬唐宗正司光宅元年改曰司屬寺有卿及少卿

文籍院

監令

少監

按此以擬唐祕書省監少監亦唐所有

太常寺

卿

按唐同

司賓寺

卿

按此以擬唐鴻臚寺光宅元年改鴻臚寺曰司賓寺

大農寺

卿

按此以擬唐司農寺

司藏寺

令

按此以擬唐大府寺

司膳寺

令

按此以擬唐光祿寺光宅元年改光祿寺曰司膳寺

冑子監

監長

按此以擬唐國子監

巷伯局

常侍

按此以擬內侍省

以上文職官

左猛賁府

大將軍一人

將軍一人

右猛賁府

大將軍一人

將軍一人

按此以擬唐左右衛光宅元年改曰左右武威衛

左熊衛府

大將軍一人

將軍一人

右熊衛府

大將軍一人

將軍一人

按此以擬左右武衛光宅元年改曰左右鷹揚衛

左熊衛府

大將軍一人

將軍一人

右羆衛府

大將軍一人

將軍一人

按此以擬左右威衛光宅元年改曰左右豹韜衛

南左衛

大將軍一人

將軍一人

南右衛

大將軍一人

將軍一人

北左衛

大將軍一人

將軍一人

北右衛

大將軍一人

將軍一人

以上皆本
新唐書

按此以擬左右羽林

以上武職

五代會要云同光清泰時渤海使臣其官有政堂省守和部少卿南海都督府政堂省守工部卿等官和部未知何屬又元龜載大元讓官學堂親衛皆無考豈後來

有所更易耶南海有都督則各府亦必有都督遼史又有諸道節度刺史則所謂軍者節度也州者刺史也此皆因唐制也

東國通鑑有檢校開國男朴漁則渤海亦有五等封爵又遼史有司徒大素賢太保夏行美是又有三司三公等職矣又全唐文大彝震時有長史

論曰渤海官制大抵因唐其立國在武后時故官名亦多同光宅制度惜所可考者止於如是然文質份份亦大畧具矣

輿服志

遼太宗幸遼陽府人皇王備乘輿羽衛以迎聖宗東巡

東京留守具儀衛迎車駕此故渤海儀衛也

遼史

按以此見渤海之有儀衛且其儀衛至遼中葉時尚存而其制不可知

其章服三秩以上猶中國之稱品服紫牙笏金魚五秩以上服

緋牙笏銀魚六秩七秩淺緋衣八秩綠衣皆木笏

唐書

按渤海官制本之唐其服飾亦然考唐書輿服志其制度雖繁而百官平日所服亦不過如是而已按國朝制度凡入觀必佩白巾二條聞以荷包垂於帶之左右滿名荷包手中漢人呼爲忠孝帶莫知所出始今考之唐書亦唐代制度也唐書高宗紀上元中敕一品以下文官並帶手巾算袋刀子礪石武官欲帶亦聽今制凡有遠行者手巾之外加佩刀子火鏢此必是唐制傳於渤海遺風至今未泯者也

論曰自古立國無不有其采章服物以辨等威況渤海

爲海東盛國不假器名何以能久宜其事事取法中國
以立邦本者矣及其鼎移祖屋尙有餘風縣延於後世
其流澤亦孔長焉較之魯效楚言杞用夷禮者何如乎
禮樂志

俗謂王曰可壽夫面對曰聖主賤奏稱基下其命爲教
王之父爲老王母曰太妃妻曰貴妃長子曰副王諸子

曰王子

新唐參舊
五代史

尙書省奏宮懸樂工總用二百五十六人自明昌閒以

渤海樂教坊兼習

金史
樂志

泰和初有司奏太常工人數少以渤海漢人教坊兼習

同上

按渤海禮樂可考者止此三條而已既曰宮懸樂人則其有雅樂可知矣

論曰渤海一隅之地耳而能禮義以爲固宜其建國將三百年也觀其稱謂一從諸侯以別於天子於事大之禮克盡所謂能以禮讓爲國者非耶至其教坊樂人至明昌大定間猶有存者知渤海之重樂府正同於唐室則酣宴以取亡或亦未之能免矣悲夫

詞命志

元宗敕渤海王大武藝書

敕忽汗州刺史渤海郡王大武藝卿於昆弟之間自相

忿鬪門藝窮而歸我安得不容然處之西陲爲鄉之故亦云不失頗謂得所何則卿雖居海曲常習華風至如兄友弟悌豈待訓習骨肉情深自所不忍門藝縱有過惡亦容其改修卿遂請取東歸肆其屠戮朕教天下以孝友豈復忍聞此事誠惜卿名行豈是保護逃亡卿不知國恩遂爾背德卿所恃者遠非能有他朕比年含容優恤中土所未命將事亦有時卿能悔過輸誠轉禍爲福言則似順意尙執迷請殺門藝然後歸國是何言也觀卿表狀亦有忠誠可熟思之不容易爾今使內使往宣喻朕意一一並具口述使人李盡彥朕亦親有處分

皆所知之秋冷卿及衙官首領百姓平安好並遣崔尋
挹同往書指不多及

張曲江文集

元宗敕渤海郡王大武藝書

敕渤海郡王忽汗州都督大武藝不識逆順之端不知
存亡之兆而能有國者未之聞也卿往年背德已爲禍
階近能悔過不失臣節迷復非遠善又何加朕記人之
長忘人之短況此歸伏載用嘉歎永作東土不亦宜乎
所令大誠慶等入朝並已處分各加官賞想具知之所
請替人亦令還彼又近得卿表云突厥遣使求合擬打
兩蕃奚及契丹今旣內屬而突厥私恨欲讎此蕃卿但

不從何妨有使擬行執縛義所不然此是人情況爲君
道然則知卿忠赤動必以聞永保此誠慶流未已春晚
卿及衙官百姓並平安好遣書指不多及

同上

元宗敕渤海王大武藝書

敕渤海王忽汗州都督大武藝多蒙固所送水手及承
前沒落人等表卿忠赤輸誠無所不盡長能保此永作
邊捍自求多福無以復加漸冷卿及衙官以下竝平安
好遣書指不多及

同上

元宗敕渤海王大武藝書

敕忽汗州刺史渤海郡王大武藝卿往者誤計幾於禍

成而失道未遙迷復能徙何其智也朕棄人之過收物之誠表卿洗心良以慰意計卿既盡誠節永固東藩子孫百代復何憂也近使至具知款曲兼請宿衛及替亦已依行大期雅等先犯國章竄逐南部亦皆捨罪仍放歸藩卿可知之皆朕意也夏初漸熱卿及首領百姓等並平安好遣書指不多及

同上

按以上諸文並見張曲江集於當時情事頗詳盡而與唐書所載不合唐書云處門藝於安西僞云投之嶺南及後仍流之嶺南據此則止於處之安西而已更無後命且其使人姓名亦與唐書不同文集出於當時史則後人追述或史有誤未可知也據此文則不久武藝悔過朝貢如初可補唐書之闕

元宗冊渤海郡王大欽茂文

於戲王者宅中守在海外必立藩長以寧遐荒咨爾故
渤海郡王嫡子大欽茂代承緒業早聞才幹昔在爾考
忠於國家爰逮爾躬當茲負荷豈惟立嫡亦乃擇賢休
問可嘉寵章宜及是用命爾爲渤海郡王爾往欽哉永
爲藩屏長保忠信效節本朝作範殊俗可不美歟

元宗弔渤海王大欽茂書

念爾王父素立誠節與善無徵奄至殂謝興言求往軫
念良深卿是長輔當襲父位宜全忠孝以繼前蹤今故
遣使持節兼弔祭

穆宗朝青州道渤海慎能至王姪大公則等授金吾將

軍放還藩制

敕慎能至王姪大公則等海東之國知義之道與華夏
同風者爾輩是也冒越深阻和會於庭予嘉乃誠命以
崇秩用奮威衛保爾恩榮無怠無違永作藩服元氏長慶集
穆宗朝青州道渤海大定順王姪大多英等授諸衛將
軍放還藩制

敕大定順王姪大多英等我有十二衛將軍以率其屬
皆匡備左右爲吾近臣自非勳庸不以輕授以汝各職
琛賚勞於梯航俾耀遠人宜示恩寵歸撫爾類知吾勸

來

同上

按此二制所云慎能至大定順不解所謂似當時別有封號無所考見矣

穆宗朝渤海王子加官制

渤海王子舉國內屬遣使來朝祇命奉章禮無違者夫

入修職貢出錫爵秩茲惟舊典舉而行之

白氏長慶集

文宗與渤海王大彝震書

敕渤海王大彝震王子大昌輝等自省表陳賀并進奉
事具悉卿代襲忠貞器資仁厚遵禮義而封部和樂持
法度而渤海晏寧遠慕華風聿修誠節梯航萬里任土
之供獻俱來夙夜一心朝天之禮義克備龍庭必會鯁
域何遙言念嘉猷豈忘寤歎勉弘教義常奉恩榮今因

王子大昌輝等同國賜卿及信物至宜領之如及副王
長史平章事各有賜物具如別錄

舒元
輿集

論曰自古立國者文事與武備交修乃能固國基而祈
永命況渤海地方五千里六十六州一百五十八縣之
廣若非藉詞命以訾程而告教之將何以提挈於其閒
乎故詞命者國之綱維古人比於喉舌之任者顧不重
哉顧不重哉爰於唐人文集揆得歷朝告渤海制冊書
命若干首載之於編惜乎渤海箋奏一字不存不禁對
簡編而追想其文物聲名之盛也

姓氏志

大氏

按乞乞仲象本姓舍利至祚榮始稱大氏舍利女真語泉水也大者女真語尊長之稱讀如平韻索倫語則爲都亦一音之轉今滿洲姓有赫舍利氏或爲大氏之族乎五代會要以舍利爲官名誤矣

高氏

按高氏爲遼東望族至今滿洲漢軍皆有之而其初則出於渤海或曰其先本高麗王朱蒙之後也爲唐所滅遂入渤海由渤海入遼尙自別爲渤海族望也入滿洲爲高佳氏

張氏

按滿洲有章佳氏滿洲姓凡曰佳者其義同家蓋譯音也若張章赫賀木穆公恭之類亦譯音無定字

楊氏

按滿洲有楊佳氏

賈氏

烏氏

按滿洲有烏札氏

李氏

按滿洲有李佳氏

賀氏

按滿洲有赫佳氏

木氏

按滿洲有穆佳氏

公氏

按滿洲有恭佳氏

辛氏

申氏 滿洲有申佳氏

茹氏

裴氏

按滿洲有培佳氏

平氏

列氏

崔氏

按滿洲有崔佳氏

文氏

按滿洲有文札氏

梁氏

按滿洲有良佳氏

任氏

按滿洲有仁佳氏

馬氏

按滿洲有馬佳氏與費莫氏同族

蔥氏

衛氏

貫氏

燕氏

按滿洲有彥佳氏

夏氏

吳氏

右凡二十八族

按又有味勃計謁德菴夫須知蒙谷欲等當是名非氏故不列之

論曰肅慎之先姓氏本不可考直至渤海始著其氏遂有二十六氏及至遼旣滅渤海遂散入齊民迨金源之興又儕渤海於漢族而與遼宋之人齒矣考古者有以國爲氏以邑爲氏以亭爲氏以鄉爲氏以地爲氏之法女真故俗大抵亦沿古法而地大宗強往往力能合一鄉之人皆爲一氏考日本望族混入者最多亦與女真

俗同蓋其初本尙武之國以族大宗強爲貴居此地者
卽入其族否則不能相容中國嶺表間亦有此風知此
者乃可與論渤海氏族

風俗志

知書契習識古今制度爲海東盛國

契丹國志

按渤海以武開國而能崇文化蓋爾雅謂東至日所
出爲太平太平之人仁漢書謂武王封箕子於其地
箕子教以禮義田蠶又制入條之教其人終不相盜
無門戶之閉婦人貞信飲食以簋豆則其風俗所從
來尙矣渤海之先本與高麗爲一及其立國蓋不失
舊觀也

俗與高麗契丹略等

文獻通考

按渤海之地南界高麗北鄰契丹其風俗之相類有
顯然者況大氏未立國之先其地本高麗舊壤也乎

如唐書所云尙容止以趨走爲敬拜則曳一腳者至今猶未改也

男子多智謀驍勇出他國右至有三人渤海當一虎之

語契丹

國志

按金史女真人滿萬則無敵於天下

婦人皆悍妒大抵與他姓相結十姊妹迭幾察其夫不容側室及他游聞則必謀寘毒死其所愛一夫有犯妻不之覺者眾人則羣聚而詬之爭以嫉妒相誇故契丹女真諸國皆有女媚而其良人皆有小婦侍婢唯渤海無之

松漠紀聞

按余昔聞諸遼東友人言彼地婦人性多妒往往反目之故多基於此今雖不致如渤海之甚然男子有

妾者終不甚多

每歲時聚會作樂先命善歌舞者數輩前行士女相隨

更相唱和回旋宛轉號曰踏鉗

王曾行程錄

按柳邊紀略莽式舞一人歌眾人皆以空齊和之謂之空齊蓋以此爲壽也

所居屋皆就山牆開門

同上

按東三省舊風房門皆在東南至今仍之入門則南西北皆火炕也以西爲尊南次之北次之此古人嘗禮觀史公序鴻門宴可見

論曰班固云東夷天性柔順異於三方之外故孔子悼道不行乘桴浮於海欲居九夷良有以也渤海地近朝鮮久被箕子之化箕子都平壤平壤渤海之西京也文

獻通考謂俗與高麗略等考高麗史五服給暇斬衰給百日齊衰期給三十日大功給二十日小功給十五日總麻給七日其法滿洲風俗所本也又不止拜則拽一腳之禮爲然矣又考柳邊記略云食用之物索於所有之家無勿與直一兩以上者價之否則稱謝而已又謂行柳條邊外率不裹糧遇人居直入主者盡所有出享客客去不受一錢此足見物豐而人富後自雲貴流入山東西賈客往居而此風始替此亦如漢書所云元菟樂浪之俗民不相盜是以無門戶之閉自取吏於遼東吏見民無閉藏及賈人往者夜則爲盜而俗稍益薄若

此者可謂古今同慨矣

物產志

俗所產最貴者太白山之兔

按黑龍江外記兔有兩種內興安嶺以南者體長毛雜土人呼爲跳兒嶺以北者目赤毛純白純黑好事者捕而畜之不食

金史遼陽府土產白兔

南海之昆布

按昆布卽爾雅之綸似綸組似組東海有之者今人名爲海帶者也今出高麗者卽渤海之南海也

柵城之豉

按柵城卽今鳳皇城以南地未聞出豉

次餘之鹿

按吉林外記云遼東山關草壯鹿得以蕃息其茸角膠血力精足入藥自爲上品

鄭頡之豕

按黑龍江外記云野豬極大生山谷以榛子橡子爲糧吉林者則食松子

率賓之馬

按柳邊紀略東北部落素產馬宋時女真嘗至登州賣馬明女真建州毛憐海西等部共歲貢馬千五百匹今柳邊內外絕不產馬皆自山海關西及高麗國來

顯州之布

按遼東麻最富吉林外記云吉林城北種麻者居多爲吉林出產一大裝蓋唐代尙無吉貝則布皆以麻爲之顯州地接開原所以有布

沃州之棉

按沃州今高麗地高麗成鏡皆出絲綢

龍山之綢

按龍山爲沃州屬縣今海城左近冊府元龜開元中
新羅王獻朝霞綢契丹國志新羅歲貢白綿綢五百
匹

位城之鐵

按位城今錦州之東今不產鐵故東三省物多以木
爲之而盛京通志云各州縣皆出鐵俟考

盧城之稻

按後漢書沃沮土肥美背山向海宜五穀善田種

涓沱之鱒

按吉林外記鱒魚似小鱖花出寧古塔南湖者極佳
柳邊記鱒魚大者三斤小者皆鱖鱒鮮美不可名狀

果有九都之李

按丸都卽高麗成川今未知出李否而盛京通志云奉天出李種類甚多又有郁李歐李皆生山閒

樂游之梨以上新唐書

按樂游滿洲源流考云當作樂浪今錦州醫巫閭山出香水梨歲以入貢見於一統志于山亦出名平頂香

海豹

按柳邊記略海豹出東北海中長三四尺闊二寸許短毛淺綠色有黑點可飾鞍轡

貂鼠

按吉林外記吉林寧古塔三姓阿勒楚克諸山林多有之甚輕煖英額以南者色黃嶺北者色紫黑

鷹

按柳邊記略遼以東皆產鷹而寧古塔尤多每年十月後卽打鷹總以得海東青爲主純白爲上白而雜他色者次之灰色者又次之

鵲

按鵲卽鵬也其翎可製扇左昭十七年鵲鳩氏杜注鵲雕也

文魚

按柳邊記略大發哈魚其皮色淡黃若文錦可爲衣裳爲襪履爲絨寧古塔之貧者多服之

熊

按吉林外記云吉省深山密林中樵采者時常遇之獵戶捕之易得也

虎

按黑龍江外紀云呼蘭多虎虎過父子兄弟不相讓獨殺之以獻幕府

松子

按吉林外記吉林烏拉寧古塔諸山皆產松子而窩
集中所產更勝

人參

按寧古塔記略云人參草本方梗對節生葉葉似秋
海棠六七月開小白花八月結子似天竹子生於深
山草叢中較他草高尺許生者色白蒸熟帶紅色紅
而亮者其精神足爲第一等
又柳邊記略云初生一椹四五年兩椹十年後三椹
年久者五椹每椹五葉葉若芙蓉一莖直上

附子

按後魏書遼東塞外秋收烏頭爲毒藥射禽獸日華
子所謂土附子今人名曰草烏頭

以上冊府元龜

細布

見前今海城蓋平兩地善織吉貝爲布染青藍紅色
歲充貢品見盛京通志

會昌元年渤海貢紫瓷盆容半斛內外通瑩色純紫厚

半寸許舉之若鴻毛

杜陽雜篇

按今東三省絕不產瓷惟高麗有之此或得之新羅
日本而非土產也或古有而今無之歟

土多貂鼠皮

按至今有關東出三寶人參貂皮烏拉草之謬

骨咄角

按此或卽今堪達漢黑龍江外記云堪達漢鹿類背
上頂下鬃駱駝沈存中筆談北方有駝鹿卽此毛
蒼黃體高大重或干劬性極馴而水行尤速角長大
色如象齒以製射鞞盛暑無穢氣
又按宋人名犀角爲骨咄見蔡君謨帖然關外無犀

白兔白鷹等

唐會要靺鞨所產
靺鞨亦屬渤海

論曰遼東一域物產之豐爲天下最故俗有遼東熟天下足之諺如忽爾罕河之珠開原撫順之金吉林之參索倫之貂皆富貴者所需也至如豆麥之富關征仰濟森林之美梓匠是須得其地而善用之富強可敵天下故渤海之盛遠邁高麗亦由其所據之地有然者管夷吾謂山王海王之國可以輕重天下其言信然哉昔者野田若棄單子知陳之將亡若己棄之而他人有之亦熟視之若無覩焉則更不知其何心矣

渤海國志卷二

渤海國志卷三

率賓唐 晏纂

吳興劉承幹校

朝貢表

唐中宗朝

遣王子入侍

敬宗開元九年

遣大首領朝唐

十年

遣大臣味勃計朝唐 獻鷹

十二年

遣賀祚慶朝唐

十三年

遣首領烏借支蒙賀正旦

王弟大昌勃價朝唐留宿衛

遣首領謁德朝唐

十四年

遣王子大都利行朝唐

遣王子義信朝唐

十五年

大昌勃價還國

遣王弟大寶方朝唐

遣菸夫須朝唐

十七年

遣王弟大瑚雅朝唐

遣王弟大琳朝唐 獻鷹鱖魚

十八年

遣王弟大郎雅朝唐賀正旦

遣使知蒙獻馬三十四匹

遣烏那達初使唐獻海豹皮五貂鼠皮

五瑪瑙杯一馬三十匹

十九年

遣大姓取珍等百二十人朝唐

二十三年

遣王弟大蕃朝唐

二十五年

遣首領木智蒙公伯計朝唐獻鷹鶻

二十六年

獻豹鼠皮千張乾文魚百口

按豹字疑誤或是貂

二十七年

遣王弟大勛進朝唐

十月遣受福子如唐謝

二十九年

遣失阿利朝唐

天寶二年

遣王弟大蕃利朝唐

自天寶訖大曆一歲數至

德宗建中三年遣使朝唐史失其人

貞元七年遣大常靖朝唐賀正旦

遣王子大貞幹朝唐

八年閏六月押靺鞨使楊吉福等三十五人

朝唐

十年遣王子大清允朝唐

十四年遣王弟大能信朝唐

憲宗元和元年遣使朝唐

三年遣使朝唐遣楊光信進奉端午

四年

遣使朝唐

五年

遣高才南及王子大延真朝唐

七年

遣使朝唐憲宗御麟德殿錫宴賜使臣

官告三十五通衣各一襲按此使不詳其人故列之

表中若知其人則賜予皆於本傳詳之此不複出

八年

遣辛文德等九十七人朝唐

遣高進禮等三十一人朝唐

九年

遣大孝貞等五十九人朝唐

遣苑孝壽大呂慶等朝唐

遣王子大庭俊等一百一人朝唐

十年

遣高宿滿朝唐

十二年

十三年

十五年

穆宗長慶二年

四年

元宗寶曆元年

三年

文宗太和元年

三年

五年

以上竝遣使史失其名

六年

遣王子大明訓朝唐

七年

遣同中書右平章事高賞英朝唐謝冊命

開成元年

遣王子大明俊朝唐

四年

遣王子大延廣朝唐

武宗會昌六年

遣使朝唐

梁開平元年

五月遣王子大昭順貢海東產物

二年

正月遣殿中少令崔光禮朝貢

三年

三月遣相大誠諤朝貢進女口及貂皮

熊皮等

乾化元年

遣使入賀

二年

五月遣王子大光贊進方物

後唐同光二年

正月遣王子大禹謨朝貢

五月遣王姪大元讓朝貢

三年

八月遣王姪學堂親衛大元謙入朝於

唐

五年

遣使裴瑒貢人參松子昆布黃明細布

貂鼠被一褥六髮革奴子二

天成元年

四月遣使大陳林等百二十六人進兒

四年

女口各三及人參昆布白附子虎皮等

七月遣使大昭佐等六人朝貢

遣高正詞貢方物

長興元年

正月青州奏差人押渤海平憲一行歸

本國被黑水劫掠

二年

遣文成角朝貢

三年

正月遣使入朝

清泰二年

十二月遣列周道

一作義

入貢

三年

遣使貢方物

論曰昔孟子有言曰樂天者保天下畏天者保其國信

然哉渤海大國也西鄰契丹南附於唐方契丹未強唐
祚正茂慎固鄰境之封克盡事大之禮年歲之閒使命
相繼以云畏天亦云至矣然而患生不備西鄰責言倉
卒之閒遂以亡國嗚呼禍常伏於所忽而憂每生於意
外如渤海者可以鑑矣

征戰表

開元十四年

武王遣大門藝任雅相擊黑水部

二十年

遣大將張文休攻唐登州萊州殺刺史

韋俊按許孟容烏承洛神道碑及昌黎烏石廟碑皆載此事

新羅兵來攻南境

貞元年

宣王伐海北諸部

遼天贊三年

攻遼遼州殺刺史張秀實而掠其民

後唐同光元年

冬十月遼兵來寇

天成元年

冬遼人來寇夫餘城

二年

春正月遼人攻拔夫餘城王弟某攻圍

夫餘城不克渤海亡

拔史但書遼拔夫餘城而不言拔上

都夫不拔上都渤海何由而亡據遼史
攻拔夫餘城後復圍忽汗城渤海王諲
謨乃出降

此爲得實

宋瀋化二年

以渤海不通朝貢令女直發兵攻之

按瀋化中渤海亡來已久不知何人朝貢
且地已屬遼女真何能攻之

論曰老子曰柔弱勝剛彊渤海初時勝兵纔十萬然北
攻黑水南伐登萊戰勝攻取一時莫之與京遂能威列
邦而定王業時高麗新亡新羅僅存海東大國惟渤海
而已至於文宣而下基業已鞏以文守之不復用兵然
而怠久玩生及譴讓不振遼兵入境一戰而亡然則三
人當虎之說亦有時而窮哉抑自古有國者生於憂患
死於安樂例固如斯耶悲夫

渤海國志卷四

率賓唐 晏纂

吳興劉承幹校

同姓列傳

大門藝 大壹夏 大昌勃價 大都利行 大

義信 大寶方 大成慶 大胡雅 大琳 大

郎雅 大姓取珍 大蕃 大常靖 大勛進

大貞幹 大清允 大能信 大延眞 大孝眞

大呂慶 大庭俊 大明訓 大公則 大多

英 大昌輝 大明俊 大延廣 大昭順 大

誠諤 大光贊 大禹謨 大元讓 大元謙

大陳林 大昭佐

大門藝武

史作高誤

王之弟也開元十四年黑水部遣使朝

唐唐以爲黑水州置長史武王曰黑水塗經我境今
始與唐家相通舊請吐屯於突厥皆先告我今不計會
卽請漢官是必與唐家通謀腹背攻我也遣門藝及舅
任雅相發兵擊黑水門藝嘗充質子於唐知利害諫曰
黑水請唐家人官更卽欲擊之是背唐也唐大國兵萬倍
我昔高麗全盛時強兵三十萬抗唐爲敵可謂雄強唐
兵一臨埽地盡矣今我眾比高麗三之一王將違之事

必不可王不從門藝兵至境又以書固諫王怒遣王從
兄壹夏代之將召殺門藝門藝懼殺壹夏而奔唐唐拜
門藝爲左驍衛將軍王使馬文軌蔥勿雅上表極言門
藝罪狀請誅之唐詔處門藝於安西詔報云門藝窮來
歸我諠不可殺已投之於嶺南并留使者不遣別遣鴻
臚少卿李道邃源復喻旨俄有洩其事者王上書斥言
大國示人以信豈有欺誑之理今門藝不向嶺南請依
前殺卻帝怒道邃復漏言皆左除而令門藝暫向嶺南
以報之二十年王遣張文休攻唐登州殺刺史韋俊唐
遣門藝發州兵擊之遣太常卿金思蘭使新羅督新羅

兵攻其南會大寒雪袤丈士卒死過半無功而還王懷
怨不已密募人至東都狙刺門藝於天津橋南門藝格
之得不死詔捕得刺客悉殺之門藝遂留宿不復歸唐書

大壹夏武王從兄也開元十四年武王遣大門藝擊黑
水部門藝不從王使壹夏代之門藝殺之而奔於唐同上

大昌勃價武王之弟也開元十三年朝唐授左武衛將

軍留宿衛十五年歸國封襄平縣男冊府元龜

大都利行武王之子也開元十四年朝唐授左武衛大
將軍留宿衛十六年卒於唐贈特進令有司護喪歸國

同上

大義信武王之子也十四年朝唐

同上

大寶方武王之弟也開元十五年朝唐

同上

大成慶不詳王之子弟武王時朝唐加官賞

張曲江集

大瑚雅文王之弟也開元十七年朝唐授游擊將軍留

宿衛

舊唐書

大琳文王之弟也開元十七年朝唐授中郎將留宿衛

同上

大郎雅文王之弟也開元十八年朝唐賀正旦

同上

按張曲江集元宗敕大武藝云大朗雅等先犯國章竄逐南鄙亦皆捨罪仍放歸藩大朗雅或卽郎雅之

訛

大姓取珍不詳某王之子弟開元十九年王遣取珍等

一百二十九人朝唐

同上

大蕃文王之弟也開元二十三年朝唐授太子舍人天

寶二年又朝留宿衛

同上

大常靖不詳某王子弟貞元七年朝唐賀正旦授衛尉

同上

大勛進王弟也開元二十七年朝唐錫燕於內殿授左

武衛大將軍留宿衛

同上

大貞幹王子也貞元七年朝唐留宿衛

同上

大清允王子也貞元十年朝唐授右衛將軍同正其下

拜官三十餘人

同上參
唐會要

大能信王姪也貞元十四年朝唐授中郎將

同上

大延眞王子也元和五年朝唐

同上

大孝眞未詳元和九年朝唐

同上

大呂慶未詳元和十年朝唐賜官誥

同上

大庭俊王子也元和十年朝唐

同上

大明訓王子也太和六年朝唐

同上

大公則王姪也穆宗長慶中朝授金吾將軍

白氏長
慶集

大多英王姪也長慶中朝唐授諸衛將軍

同上

大昌輝王彝震之子也文宗時朝唐賜王官誥妃及副

王長史平章各有賜物

舒元
與集

大明俊王子也開成元年朝唐

舊唐
書

大延廣王子也開成四年朝唐

同上

按溫庭筠集有送渤海王子歸國詩云疆理雖重海
詩書本一家盛動歸舊國佳句在中華定界分秋漲
開帆到曙霞九門風月好回首即天涯飛卿以大中
初應進士入京是宣宗以後尙有王子來朝史臣失
記其名耳其曰佳句在中華是其人能詩惜一句不
存矣

大昭順王子也梁開平元年五月朝貢海東物產

同上

大誠諤未詳官相國開平三年朝梁貢人口及貂皮熊

皮等

同上

大光贊乾化二年五月朝梁貢方物厚有賜錫

同上

大禹謨王子也後唐同光二年朔正旦

同上

大元讓王姪也後唐同光二年正月入朝莊宗賜金綵

以遣之

五代會要

大元謙王姪也後唐同光二年八月入朝官學堂親衛

後唐授試國子監丞

同上

大陳林未詳天成元年四月入朝貢男女口各三人并

人獲昆布白附子虎皮等同往一百六十人

同上

大昭佐未詳天成元年七月貢方物同往六人

同上

論曰昔周之興也宗子維垣而魯衛列邦蓋亦政在同

姓此固古制相沿而亦必其本支之多材俊也及亡也

亦以其宗室之尙驕汰也況東方者木木茂則枝葉盛木彫則枝葉零渤海爲國地居東方應木之氣故其興衰有象於木此亦五行之數然爾叔向日公室將亡其枝葉必先落亦千秋之炯鑒也

異姓列傳

任雅相 馬文軌 蔥勿雅 味勃計 賀祚榮

烏借支蒙 謁德 菸夫須 知蒙 烏那達

初 張文休 木智蒙 公伯計 受福子 失

阿利 多蒙固 楊光信 高才南 辛文德

茆壽貞 高進禮 高宿滿 高賞英 崔光禮

裴瑒 文成角 高保父 列周道 高正詞

平憲 烏濟顯

任雅相文王之舅也開元十四王命其副大門藝擊

黑水部

舊唐書

馬文軌大門藝奔唐王使文軌及蔥勿雅上表極言門

藝罪狀請誅之

同上

蔥勿雅與文軌偕上表於唐

同上

味勃計開元十年朝唐授大將軍

冊府元龜

賀祚榮開元十二年朝唐賀正旦

同上

烏借支蒙開元十三年朝唐賀正旦

同上

謁德開元十三年朝唐授果毅

上同

蔡夫須開元十六年朝唐授折衝

上同

知蒙開元十八年朝唐獻馬三十四匹

上同

烏那達初開元十八年朝唐獻海豹皮貂鼠皮瑪瑙杯

一馬三十四匹

上同

張文休開元二十年武王遣其率海賊攻唐登州萊州

殺刺史韋俊唐命大門藝將州兵來戰不能勝又命太

僕卿金思蘭發新羅兵夾攻亦不克

舊唐書

木智蒙開元二十五年朝唐獻鷹鶻時官首領

册府元龜

公伯計開元二十九年偕木智蒙朝唐

上同

受福子未詳爲名爲爵開元二十七年朝唐上同

失阿利開元二十九年朝唐上同

多蒙固元宗時送唐水手及沒落人至唐唐會要

楊光信元和二年使唐進奉端午逃歸至渝關吏執之

以返上同

高才南元和五年偕大延真使唐七年宴使臣於麟德

德殿賜官詔二十五通衣各一襲上同

辛文德元和八年偕九十八人使唐上同

茹壽貞元和十年使唐上同

高進禮元和八年偕三十八人使唐上同

高宿滿元和十一年三月使唐授官賜同使二十人官

話

同上參
唐會要

高賞英官同中書平章事太和七年如唐謝冊命上

同

崔光禮官殿中少令開平二年朝梁

五代
會要

裴璆官政堂省守和部少卿賜紫金魚袋後唐同光三

年朝貢人獲松子昆布黃明細布貂鼠被一褥六髮革

奴子二拜右贊善大夫

冊府
元龜

文成角後唐長興二年十二月入朝留四年拜爲朝散

大夫右神武軍長史賜金紫

五代
會要

高保父官右錄事試大理評事奏事入唐拜爲朝散郎

右驍衛長史賜金紫

同上

列周道

元龜作義

官南海府都督後唐清泰二年十二月入

貢三年二月拜爲檢校工部尙書

五代會要

高正詞天成四年貢方物於後唐拜太子洗馬

同上參元龜

平憲長興元年入朝歸國被黑水劫掠

冊府元龜

烏濟顯官政堂省工部卿入朝後唐拜試光祿卿

五代會要

論曰世謂渤海之興蓋乘高麗之餘業故其土地人民

半取之於高麗不知高麗之初又何所取之哉昔殷之

亡箕子亡之朝鮮朝鮮者肅慎之南部也及惠帝之末

燕人衛滿據而有之至漢武滅衛氏以其地建四郡所

謂眞番臨屯樂浪元菟是也而地遂屬漢若當時又有
所謂眞番辰國者番應劭音盤又作番汗則弁韓也辰
國卽辰韓也考辰韓後改爲新羅弁韓亦爲新羅所有
皆在漢宣元之際是眞番雖爲郡而不久又失之終漢
之世止樂浪元菟歸中國耳漢書又謂故燕齊亡者皆
在朝鮮是其地固爲當日肅慎之境而箕子居之則爲
朝鮮衛滿有之則爲高麗且春秋之時楚與吳皆號蠻
夷迺憑陵上國與齊晉狎主中國亦遂中國之矣使當
其時肅慎有人亦爲芊侶夫差之爲者則史且入之世
家代且稱之華胄矣然則如渤海諸臣其爲肅慎之裔

歟朝鮮之支歟燕齊兩漢之流寓歟誰得而知之誰得而析之哉考清室受命之初朝鮮人來歸化者例入滿洲籍如朴氏金氏王氏李氏皆著在氏族通譜得其本源矣

子遺列傳

大光顯 大元鈞 大和鈞 大福謨 申德

大審理 朴漁 吳興 冒豆干 大素賢 羅

漢 烏思羅 大鸞河 李勛 夏行美 李匡

祿 高模翰 坎匡乂 大公鼎 子昌齡 昌朝 楊祥世

高安國 楊朴 高六哥 子彪 梁福 韓荅刺

高楨 高德基 高衍 大奉國 大懷貞

高竑

王政

子遵仁遵古

高錫

王庭筠

子曼慶

高仲

振

大穎

大興國

邦傑

大磐

大慶山

李英

大光顯王禋讓之世子也渤海旣亡光顯率其遺臣大元鈞等奔高麗高麗王錫光顯名曰王繼附之宗籍使

奉其祀

東國通鑑

大元鈞官司政

同上

大和鈞官禮部卿

同上

大福謨官工部卿

同上

申德官將軍

同上

大審理官左右衛將軍

同上

朴漁檢校開國男

同上

吳興官工部卿

同上

冒豆干官小將以上八人皆隨世子奔高麗者

大素賢官司徒遺滅渤海冊太子倍爲人皇王以大素

賢爲左次相渤海老相爲右次相

遼史

按此老相非名北方語謂舊爲老當是故相之稱

羅漢官渤海宰相遺滅渤海以爲權東京統軍使

同上

烏思羅

五代會要作烏斯多

周顯德元年七月率三十人奔周

冊府

元龜

大鸞河宋太宗太平興國四年伐遼鸞河率小校李勛
等十六人族三百騎來歸宋以爲渤海都指揮使九年
春宴大明殿召鸞河慰撫久之謂殿前都校劉延翰曰
俟高秋戒候當與駿馬數十匹令出郊游獵以遂其性

因以緡錢十萬併酒賜之

文獻
通考

夏行美官太保遼太平九年大延琳之變延琳遣使令
圖統帥行美時總渤海軍於保州執延琳使送總帥耶
律蒲古以功同政事門下平章事明年遷忠順軍節度

使十七年遷副部署致仕卒

遼
史

李勛以小校隨大鸞河入宋

通
考

李匡祿大延琳時爲郢州刺史如高麗乞師延琳敗遂

留高麗

東國通鑑

高模翰一名松渤海人有膂力善騎射好談兵渤海亡避地高麗高麗王妻以女因罪亡歸遼太祖以爲將會同二年冊禮告成宴百官及諸國使於二儀殿帝指模翰曰此國之勇將朕統一天下斯人之力也封愆郡開

國公官至中臺省左相

遼史

大康父渤海人仕遼官南京宰相

同上

大公鼎渤海人先世籍遼陽率賓縣統和閒徙遼東豪右以實中京因家於大定公鼎幼莊愿長而好學遼咸

雍十年登進士第調潘州觀察判官遷興國節度副使
拜大理卿歷長寧軍節度副使南京留守改東京戶部
使時盜殺留守蕭保先始利其財因而倡亂民亦互生
猜忌家自爲鬪公鼎單騎行郡陳以禍福眾皆投兵而
拜曰是不欺我敢不聽命安輯如故拜中京留守賜貞
亮功臣乘傳赴官時盜賊充斥有遇公鼎於路者卽叩
馬乞自新公鼎給以符約俾還業聞者接踵而至不旬
日境內肅清會奴賊張薩巴率無賴嘯聚公鼎欲擊而
勢有不能因憂憤成疾卒子昌齡左承制昌嗣洺州刺

史昌朝鎮寧軍節度

同上

楊祥世大延琳之將延琳之敗祥世開南門納遼軍

同上

高安國辰州渤海人官遼興辰開三州節度使

同上

楊朴遼東鐵州人也本渤海大族少第進士累官校書

郎高永昌之變降女真頗用事阿骨打用其策始稱皇

帝建元天輔以王爲姓以旻爲名國號大金朴又勸國

主遣人詣天祚求封冊天祚付東北面大臣議遂遣使

備袞冕之服冊爲東懷皇帝國主召朴等觀驗以儀物

不純用天子之制東懷乃小邦懷其德之義仍無冊爲

兄之文又冊文如遙芳多戩皆非美意彤弓象輅亦諸

侯事命歸易之阿骨打大怒叱出使副欲腰斬之明年

三月遣使副歸和議遂絕朴又建冊立后妃之位國主

從之

大金國志

高六哥安國子也遼末官左承制至刺史入金爲千戶

遼史

高彪六哥子也本名召和失代父爲榆河州千戶金天會五年授靜江軍節度使壽州刺史勇健絕人能日行三百里身被重鎧歷險如飛身先士卒未嘗反顧大小數十戰率以少擊眾歷官武勝軍節度使封郅國公改

舒國公諡桓肚

同上

梁福渤海人幹荅刺亦渤海人金太祖進軍寧江州召

梁福幹荅刺使之僞亡去招諭其鄉人曰女真渤海本

同一家我興師伐罪不濫及無辜也

金史

高楨模翰之孫也金官御史大夫加司空封代王

同上

高德基字元履遼陽渤海人金皇統二年登進士第六

官至刑部尙書子錫

同上

高衍字穆仲遼陽渤海人敏而好學自少有能賦聲年

二十六登金進士第官至吏部尙書銓事修理選人便

之

同上

大奉國臣遼陽渤海人金海陵母永寧太后族人爲東

京警巡院使

同上

大懷貞字子正遼陽人金代官至彰德軍節度使縣尉
獲盜得一旗上圖亢宿詰之有謀叛狀株連幾萬人懷
貞當以亂民之刑誅其首亂者十八人餘皆釋之錦州
富民蕭鶴壽途中殺人匿府少尹家懷貞以計取之寘
於法

同上

高竑渤海人以廕補官金代累官左藏庫副使元妃李
氏以阜幣易紅幣竑獨拒之妃奏之章宗嘉之曰所執
甚善今姑與之後不得爲例貞祐中至河北西路按察
轉運使

同上

王政本名南撒里辰州熊岳人也其先仕渤海及遼皆

有顯者政當遵季亂浮沈鄉里高永昌據遼東知政材
略欲用之政度其無成辭謝不就永昌敗渤海人爭縛
永昌以爲功政獨逡巡引退金闈母聞而異之言於大
祖授廬州渤海軍謀克官至保靜軍節度使初政以親
軍都指揮使兼掌軍資時軍旅始定筦庫紀綱未立掌
吏皆因緣爲姦政獨明會計嚴扃鑰金帛山積而出納
無錙銖之失闈母戲曰汝爲官久矣而貧不加富何也
對曰政以楊震四知自守安得不貧闈母笑曰前言戲
之耳以黃金百兩銀五百兩及所乘馬遺之子遵仁遵

義遵古

同上

高錫字永之德基子以廕補官官至河北東路按察轉運使貞祐初城破自投城下而死

同上

王庭筠字子端遵古子也生未期視書識十七字七歲學詩金大定十六年登進士第調恩州軍事判官再調館陶主簿明昌元年召試館職中選御史臺言其在館陶嘗犯賊罪不當以館職處之遂罷乃卜居彰德買田隆慮讀書黃華山寺因以自號三年召爲應奉翰林文字命與秘書郎張汝方品第法書名畫遂分入品者爲五百五十卷五年爲翰林修撰泰和二年卒年四十八詔有司贖錢八十萬求生平詩文藏之秘閣又以御製詩

賜其家其引云王遵古朕之故人也乃子庭筠又以才
選直禁林者十年今茲云亡玉堂東觀無復斯人矣庭
筠儀觀秀偉善談笑外若簡貴人初不敢與接既見和
氣溢於顏閒殷勤慰藉如恐不及少有可取極口稱道
他日雖負不恨也從游者如韓温甫路元亨張進卿李
公度其所薦引者如趙秉文馮璧李純甫皆一時名士
世以知人許之爲文能道所欲言詩律深嚴七言長篇
尤工險韻有蕪辨十卷文集四十卷書法學米元章與
趙風趙秉文俱以名家尤善山水墨竹子曼慶亦作萬慶亦
能詩并書仕至行省右司郎中自號澹游上同

高仲振字正之遼東人其兄領開封鎮兵仲振依之以居既而以家付其兄挈妻子入嵩山博極羣書尤深易皇極經世學安貧自樂不入城市山野小人亦知敬之嘗與弟子張潛王汝梅行山谷間人望之翩然如仙或曰仲振嘗遇異人教以養生術嘗終日燕坐骨節戛戛有聲所談皆世外事有叩之者輒不復語云

同上

大穎金正隆間爲翰林待制嘗言山東盜賊海陵惡其言杖之世宗嘉穎忠直起爲祕書丞

同上

大興國初事金熙宗爲寢殿小底權近侍局直長最見親信及海陵弒熙宗興國預其謀海陵以興國爲廣陵

尹大德四年改崇義軍節度使賜名邦基世宗卽位廢
於寧海陵降爲庶人遂磔之於思陵之側同上

大邦傑邦基之兄官京兆判官同上

大槃官驍騎指揮使金海陵之死大槃整兵來救無及
乃取其衣巾裹海陵屍焚之同上

大慶山亦侍金海陵海陵之死慶山曰事急矣當出避
之海陵曰走將安往方取弓以中箭仆地慶山亦被殺

同上

李英字子賢其先遼陽人

歸潛志云遼陽渤海人

徙益都中明昌

五年進士第調濶化主簿封工通遠令尙書令史遷監

察御史右元帥朮虎高琪辟爲經歷官乃上書高琪曰
中都之有居庸猶秦之有崤函蜀之有劍門也邇者撤
居庸兵我勢遂去今土豪守之朝廷當遣官節制失此
不圖忠義之士將轉爲他人矣高琪奏其書卽除尙書
工部郎外郎充宣差都提控居庸等關隘悉隸焉二年
正月乘夜與壯士李雄郭仲元郭興祖等四百九十人
出城緣西山進至佛巖寺令李雄等下山招募軍民旬
日得萬餘人詭稱土豪時時出戰被創召還遷翰林待
制因獻十策其大概謂居中立以鎮四方委親賢以收
中都立藩屏以固關隘集人力以防不虞養馬力以助

軍威愛禾稼以結民心明賞罰以勸百官選守令以復郡縣并州縣以省民力頗施行之宣宗南遷以英爲御史中丞英言兵興以來百務皆弛其要在于激濁揚清獎進人材耳近年改定四善二十七最之法徒爲虛文宣宗嘉納之中都久圍丞相承暉遣人以礮寫奏告急詔永錫烏古論慶壽將兵英督糧運救中都與元兵遇于霸州北大敗盡失所運糧英死士卒殲焉贈通奉大夫諡剛貞官護葬事錄用其子

同上

論曰自古亡國之餘其公侯將相齒於齊民者有之矣降爲輿臺者有之矣係虜而死者有之矣若其流入他

國表然獨異逮數世之後尙可指爲某國之人其人又皆足自樹立不與凡俗波靡渤海之外蓋未易多見矣所列子遺諸人如高模翰高彪之武功大公鼎大懷貞之吏治高竑王政之廉隅王庭筠之文學高仲振之高尙雖古史所載何以尙之若楊朴者又耶律楚材之嗃矢也所惜渤海舊史無傳不然立國規模宏遠如是固宜有人焉爲之經畫又必有人焉以輔其休明者文獻無徵深可慨焉余又聞之故老云北宋高瓊初亦渤海遺黎國亡而遯荒入宋者宋史作燕人則模翰之族清初高佳氏入關蓋與瓊之後裔出繼於海寧陳氏者尙修宗族之禮

焉而高陳二氏又復黻冕相仍祖孫繼美嗚呼流風遠矣

渤海國志卷四